

Uvodnik

Demonstracije na ulicama Njemačke pod imenom *Patriotski Evropljani protiv islamizacije Zapada* (PEGIDA), početkom ove godine, bile su sedmicama glavna vijest u međunarodnim, ali i domaćim medijima. Niz događaja - pokretača, prethodilo je ovim demonstracijama, a one su po reakcijama koje su uslijedile, bile pokretač otvaranja nove, otvorenije diskusije, posebno u Njemačkoj, o unutrašnjim složenim društvenim odnosima i pitanjima. U javnosti su se pojavile „nikad dovršene“ debate o sigurnosti, integrativnoj politici, građanskim slobodama, uzorcima radikalizacije, strahovima i naravno, islamu.

Reakcije, na pojavu PEGIDE, vladinih zvaničnika, vjerskih zajednica i crkava, akademske javnosti i najvećeg broja običnih građana u Njemačkoj, te vrlo brzo i kontrademonstracije jasnije su pokazale da njemačko, ali i druga evropska društva, nisu polarizirana samo po principu „mi“ i „drugi“ tj. migranti/muslimani, nego i da postoji polarizacija unutar onog korpusa koji se smatra autohtonim njemačkim/evropskim.

Odakle PEGIDA? Da li su stavovi koje sudionici ovih protesta zastupaju novi, ili je novo samo to da se izražavaju u otvoreno i na ulici? Da li je u pozadini protesta islamofobija i rasizam u novom ruhu? Kako muslimani u Njemačkoj reagiraju na demonstracije, i kako su muslimanske organizacije reagirale na događanja koja su im prethodila, između ostalog napad na uredništvo magazina *Charlie Hebdo*? S kojim se to izazovima mora suočiti i Islamska zajednica Bošnjaka u Njemačkoj? Kako odgovoriti na rastuće anti-islamsko raspoloženje? Da li je vrijeme da muslimani ozbiljno pogledaju u sebe?

Novi Muallim, u ovom broju donosi nekoliko tekstova koji su svojevrsan doprinos diskusijama na ovu temu, pokušavajući rasvijetliti neka od pitanja koja je nametnula ova pojava u njemačkom društvu, i to kroz stavove autora koji odlično poznaju tamošnje prilike.

Vašoj pažnji posebno preporučujemo i intervju sa Ziauddinom Sardarom, britanskim intelektualcem pakistanskih korijena čije polje interesovanja uključuje historiju muslimanskog mišljenja, studije budućnosti, filozofiju nauke i kulturološke studije u najširem smislu – ali i druge tekstove koje donosimo u ovom broju.

Senada Tahirović